



喙鳴文集卷十一目錄

表

擬宋承天節百官上壽是日皇子加冠禮司
天奏日輝珥廷臣賀表

擬宋王魯諱錄古先聖賢六十事繪圖以獻
上降詔褒美命禁署月進二十軸仍鏤版
印賜近臣謝表

擬宋以田錫為左拾遺謝表

擬疏

擬貢禹節儉疏

議

春和賑貸議

採荒議

練兵議

閩廣善後事宜議

新建文成侯謚議

喙鳴文集卷十一

四明沈一貫肩吾著

表

擬宋承天節百官上壽是日皇子加冠禮司

天奏日輝珥廷臣賀表

祥符八年
萬曆戊戌會試作

祥符八年十二月二日恭遇承天聖節臣某等敬

率百官祝萬萬歲壽即日伏覲皇子榮加冠

禮司天奏言太陽輝珥狀玄貺景合謹用表賀者

天保南山合殿繞長生之祝日昇重霄垂繼

照之符偉茲元儲敬始之儀誕協皇覽揆初之候
謨烈光騰于善慶天人喜溢于貞休臣等誠歡誠
忭稽首頓首上言伏以華祝敷詞富壽將多男並
禱箕疇演筴康強與逢吉同占故歌既醉斬萬年
頤昭融于胤嗣而答鳧鷖薄百福期申引于將來
惟明聖丕受天地山川之釐惟元良永綏宗廟社
稷之祐周烏流赤乃眷武之善成漢日再中蓋彰
文之蚤建將壽民而壽國宜克長而克君厥隆著
代之初尤謹加冠之始十五而棄幼志再三以申

嘉辭吉月今辰敬致阼階之醮緇冠爵弁肅修祖
廟之禋光祿贊儀魏著臨軒之節司徒將事唐增
御幄之文未有仰感劬勞俯殷佑啟就繞電流虹
之日為貽謀燕翼之圖慰祖宗付託之初心開嗣
祚纘承之永烈山稱萬歲日覩又新義易考祥契
黃離之元吉漢詩咏美卑皓月之重輪如今日者
也茲蓋伏遇○○○○觀妙自然游真大素葆靈
根而善固群心傾就日之明茂寶葉以彌昌率土
恃戴天之輦下漢武之武竟羽族以懷音尚周文

之文窮毳鄉而頰首乃者時當誕聖節屆承天齊
七政于玉衡正紀二陽之候錄千秋于金鏡咸歡
萬國之心效嶽貢而秩儀質河清而作頌雲樓氣
敞綵仗風和雪藕冰桃甫霈天家之宴瑤山銀榜
還開長子之宮快覩承華洵優繼體鍾祥甲觀宮
中諧赤帝之祈稟秀克門臺上應玉釵之卜繫天
下之心已久當成人之始于茲爰奉綸恩敬修冠
典天意默形于同物皇儀並展於一朝赤羽青絢
光分日月玉旒皮弁象納山河備敬名諭志之容

撰貴體明嫵之禮醮以太公望召公奭周公旦式
表彌尊教之為人臣為人子為人君亶期大競都
士咸忻其曠視昊穹亦厚以明歆宗人方用醴以
篚登馮相遽察璣而薦祉翔鳥拂羽光流若木之
英飛馭扶輪暈合垂虹之氣赤燦內朗初煜燁以
掄輝黃理外通倏回環而抱珥分明兩作少陽璧
合于太陽彷彿重華舜日蟬聯于堯日不先不後
綜事應其甚明自古自今炳乾坤而獨曜此實受
天百福以著增輝之象謂宜作宋一經而佐萬壽

之觴臣等泳澤康衢舞風盛世叨陪末位預覲竒
尤羽翼何勞紛衣冠而獻曝股肱可竭望閭闔以
舒葵伏願懋育百嘉晏清六幕有典有則明明禹
子之貽制事制心赫赫湯昆之裕臨翠媯而凝道
八千含旗翼之春坐玄扈而披真億萬擁河圖之
曆

擬宋王曾詮錄古先聖賢六十事繪圖以獻
上降詔褒美命禁署月進二十軸仍鏤版

印賜近臣謝表

天聖元年
萬曆癸酉

代應天作

天聖元年某月某日具官臣王曾恭遇 皇上冲
年御寓竊效愚忠詮錄古先聖賢事蹟凡六十事
繪圖以獻伏蒙 聖明嘉納降詔褒美命禁署月
進二十軸仍鏤板摹印遍賜近臣臣曾誠歡誠忭
稽首頓首稱謝者 聖謨未墜依繪事以陳愚
帝德方新降綸音而示獎玉檢分程於禁禦琅函
侈錫於臣隣善沛江河光增日月祈而且謝頌敢
忘規竊惟聖賢為道法之宗學惟古獲人主建皇
彝之極識以前資卷茲圖畫之興蓋與簡書並遠

史皇作而盡物象軒后受以紀人倫亳宮擁九主
之儀明著保衡之訓周廟絢四墉之狀於昭篤棊
之猷蓋書難盡意盡言故章施是設而事以不尊
不信則聖哲為徵獻忠比於韋絃懋德資其斧藻
托契攸在振古如斯若乃宋弘座障之規義存好
德班伯畫屏之諫志在繩愆環墓無逸於內庭文
績尚書於太液斯雖洵美尚乏無資臣初誦讀之
時竊有聖賢之志矢奉賡歌之末非堯舜不敢敷
陳苟惟溫飽之謀捷市朝可勝愧耻何期齒錄

見身親茲蓋伏遇○○○○禹湯勤儉堯舜寬仁
茂稟英姿備天地中和之至光膺寶籙續祖宗功
德之隆穆穆而宜君宜王克邁率由之訓明明而
有典有則丕承貽厥之思雖始乾元建始之初已
稱令德守文之主然匪進則退者學可無夙夜之
勤而難得易失者時宜及春秋之富臣職叨三事
忠罔寸禪涉文字以來之書粗能成誦憶聖賢所
有之事謂必可師是以采其較明審厥象肖君如
虞夏商周之盛臣若臯

傅之良周公思而四

事無孔子作而六藝備先聖後聖比肩毫素之間
大賢次賢接武蟬蛸之上璀璨乎黼黻絺繡之文
具在依稀乎几席盤盂之戒如存玉質金相儼當
年之有覲尸居淵默同在日之無為目擊而不容
聲卷開而大有益條為六十若玄黃之體分德罔
二三蓋純白之道備人可今而遊古物雖假而助
真纂輯忻成函封敬上絲綸字貴俄驚榮袞之褒
擅履功勤更喜虛襟之納申命清嚴之署月分進
御之程虞拜陶歌不數從寬問一漢稱賈語無
使俊陳三且欲流之薦紳特令壽於文梓金雕玉
鏤烟開七曜之圖寶韞牙披爛發五神之檢賜出
尚方之副榮增冊府之光臣敢不揚厲洪庥奉承
德意蠡難測海雖無益於萬分馬有識途尚續陳
其一得下洒腐儒之耻上酬真主之知顧臣意不
在丹青願無移於山水且臣圖異于物色願無委
于塵埃乘茲蒙養之初益勵乾行之健士希賢賢
希聖聖賢伍而同歸人法地地法天天地參而建
極庶幾責難陳善之意會見登三閱五之成

擬宋以田錫為左拾遺謝表

太平興國六年隆慶戊辰應制科作

龍作納言聖主廣四門之益虎拜稽首愚臣叨兩省之榮線補衮以無能負且乘而甚忝捫心惕息陳力競凌臣誠惶誠恐稽首頓首上言竊惟自古願治之君必啟求言之路五帝聖神莫及豈乏臣隣三代直道而行尤多獻替訪合宮聽衢室謂匹夫匹婦之能勝憂擊磬獄搖輶何一饋一沐之不暇迨師氏保氏之官分設而藝諫諂諫之語尤多不曰爾卿士其交儆予則云子大夫尚明告我若

諫議之名起于漢肇有專員至拾遺之職備于唐沿為定制梧埤閫靜檢封事於晴牕花掖嚴深披愴惊于曉陛雖芻蕘必採有慙隆古之風而石錯相攻尚得先民之意顧須骨鯁乃克舉官矧是領鱗誰能批逆所以朝陽之鳳收響而抱葉之蟬遞聞臣竊心傷是誠國蠹使夫人皆泄泄而保祿則誰復有惓惓而效忠碎首何難頓首有禪于元首剖心非痛期無負於腹心在聖明選衆之公貴有臯陶之舉何淺薄寡聞之士濫叨東郭之吹許身雖

比于雙金補闕終慙于一字茲蓋伏遇○○○○
緝熙駿命參配鴻儀虎步龍行兆太平于閔緯虹
舒電鑠專沛澤於神區既翊聖以開基迺紹天而
闡繹蕩神威于八極醴福應於萬年百察微驩鯨
之奸尚興思于屈軼庶族悉辛陽之舉猶采體于
微封是厯詔墨之慈猥有章縫之冒蓋將責持橐
簪筆之效庶幾為位宁倚几之資成命難回隆施
曷報敢不勉修白記仰贊黃圖素祿為羞况侈箋
籐之給緇衣既忝猶勤庭燎之求杜甫以其身比
于夔龍回何人也魏徵愧其君不如堯舜丘亦耻
之伏願側席異聞開顏讜論憂民訛而興刺毋懷
予聖之心敕天命以作歌務攬爾賢之益庶魑魅
莫逃乎禹鼎而陶漁不隔于虞門錯居以赴八音
之離庶吉交賜夫采采執契而正三衡之序九功
益峻于巍巍

擬疏

擬貢禹節儉疏 館課

臣禹跼伏草野行能無狀遭逢聖明召對闕下令

臣效其愚忠陛下幸不加誅貴用其言詔太僕減食穀馬水衡減食肉獸省宜春下苑以惠貧民黜角觝諸戲及齊三服官遷臣光祿大夫言效計從道用身尊蓋陛下詢于芻蕘以增虞帝之華四海頌謳比聖茅茨身愈減損道愈魏顯此臣逢時效忠之秋也臣實內感輒復有言臣聞昔之君子即安其居節醜其衣服車不雕幾器不刻鏤食不貳味以與民同利上作而下從之驩然同欲帖然相守故等威有辨而民不亂也臣聞桀用天下而不足湯用七十里而有餘天子尊嚴有所徵作敢不輸供則刀鋸臨之故用日益侈而過日益多群下不敢匡天子不得聞又至尊工作必有需副用一費百虛于委藏奸人乾沒乘間而作宮中之百錢民間之百緡也可不慎與上者下所望也奢者民所欲也以所望之人開所欲之路若決江河而東之潰不待日矣故令衆庶無禮讓之節乏儉素之守爭趨文巧僭踰為高鬻財破產以悅衆視掩虛見實以僥稱貸資未至之財為當年之歡寧耐饑

渴以鷺綺穀寧餒父母以食賓客及至流離瑣屋
尚飾虛裝以欺閭里抵于敗露然後強者竄為盜
賊弱者轉於溝壑流凶邑有丁口巷絕皆繇驕奢
不職之過也本朝稱窮黷虛耗以孝武皇帝為言
然臣聞孝文皇帝時乘輿賜竭取給大農大農錢
盡續以少府經費不常紊亂無制蓋已然矣庶民
賣僮者繡衣絲履內之閑中穀紬黼黻以被墻屋
庶人帝服倡優后飾蓋賈誼先朝已為太息使及
見今悲宜何已此臣日夜腐心欲採之而力不建
者也陛下幸察臣言不難貶損以先四海然非大
改觀聽也今關東流民歲死亡者數萬而有司不
聞賑恤關內之衆彌多失業少府陂澤乃為貴戚
冒懇徒以益驕志滋過敗耳曷若捐之以業貧民
厚根本乎百官者天子之手足耳目也今園池鴈
鷺厭餘梁粟而公車索米于長安綵繒絲幣布滿
離宮殿風過之激為游蓬而士曾不得為蔽膝大
吏俸薄何以教庶小吏俸薄何以勸勤曾不若舞
文大猾素封齊民擊歌鐘擁子女雄居名都比于

王者為愉快也古者錦衣珠玉成器不鬻于市衣服飲食不鬻於市所以禁不儉也作淫聲異服竒技竒器以疑衆者殺所以一衆心也車騎宮室旗幟章服婚嫁死生之具自王公以至庶人皆有衰等非以厭縱貴人之耳目而為卑賤減惜所以貞百度而別群流也自漢興以來叔孫通不能佐高皇帝定制立極襲亡國之俗令男女亡限貴賤亡數迤及孝文賈誼言之而不能用建元以來孝武用之而非其道富者恣所好美貧者身不得自立民之趨富侈如流水而避貧儉若烈火至乃弄法干紀刺章偽書椎埋攻剽劫人作奸掘冢鑄幣走死地如鶩吏禁之不衰亂源由上非可移咎傳曰為國以禮禮所以辨上下定民志與其奢也寧儉願陛下以儉示天下悉罷無名之征除無益之費宮殿苑囿不御者盡詔勿治嬖幸請求各以義裁與群臣通經有道術者講求先王之制創制定法辨章服立等威務合禮本以定漢家之極使天下曉然尊者不為亢卑者不為屈隆不加多殺不加

少遣諫大夫博士以天下教禮儉討竒表壹道
德同風俗如此則奢僭不生而上下有制皇極之
統復太平之業建矣

議

春和賑貸議 閩試

伏奉詔旨方春氣和令臣等議所以賑貸百姓者
臣惟賑窮之章裁在月令省耕之典列於軻書王
者布德施惠損上益下視民之饑猶已之饑况萬
物迎春勾萌尾孽而使閭閻有啼號之痛同類蒙

輾轉之戚仁人隱惻誠所未安 聖念及此寔應

古道即虞帝好生之德周王如傷之視豈復過茲
詔下之日載道歡呼未賜而飽未賜而溫和德所
蒸遐邇延慕既欣欣乎若百卉之向榮矣臣敢不
將順 聖慈謹議其方臣惟 陛下臨御以來恭

已愛民宜四海從風而嚮治不費而家給然杼軸
尚空蓋歲尤鮮下民跂小康之望道路興賴尾之
嗟蓋奉宣德意者不得其人而吏道壞也臣愚以
為宜明敕所司誠心體國部下之省省下之府府

下之縣縣聚民於其鄉就而訊問老者稚者笄弱不能自存者鰥寡孤獨癡疾不任職業者幾何人孝悌力田者幾何家而賜之有羞毋令主計吏乾沒其間及有求于當受粟者之家使吾民名為受上之賜而亾其實也毋聚民于郡縣久而不予反阡陌之及令民或受粟者百里而遙遠荷重趼之勞僦車賃馬之費視所受過當皆非陛下所以鞠憐赤子意也今有司狼貪豹搏于睢罔上餒焉哀欲而色暴亢者既膏吾民而不省其下者嬰姍選

悞媿姍恣慮威令不行小吏為奸過雖有間同歸

無良雖 聖恩煦育並生萬方而詔書每下廢閣

不行豈所以承流宣化而為民師帥之道哉諸犯此者許風紀諸臣劾奏以聞則奸宜少衰而惠澤流矣又郡有穰凶地有肥磽儲有贏乏而民有有餘不足宜令隣壤得以相饒通其有無務在周洽毋以財匱為解陛下至仁歲歲存問黎甿無有已時自茲以往所司益宜簡櫛庶貪量入為出勸農桑時賦歛省敲朴罷營建集流民禁末作厚儲蓄

敦儉素專務以德化民使所在有如京之積大賚四海無憂財竭以佐陛下龐仁駿澤于無窮有不如今者坐如律勿貸如此則主恩不格于上民隱不阻於下和氣塞乎宇縣春溫遍乎窮鄙矣

救荒議

頃西北所在告饑當宁憂之特諭發太倉銀三十萬遣使分賑諸司日夜講所以濟之之策而使者又以不給請矣夫賑恤之詔第可以明聖主軫念元元之意係屬人心使無他耳遠不抃近而

况施予有限豈能為溝中之瘠重輕哉不若勸民相養之為利博也勸民相養則貴輕重之術焉天之道損有餘而補不足醫非能起死人也不過視人五臟中有餘不足之處而為之導迎以相補助則病可起而死可活救荒者亦當視天下積蓄有餘之處去其闕礙而使之流通則民可活乃西北之人不能度日而東南米價之平自若此非有闕礙不通之處乎天下一家也飯則俱飯粥則俱粥始可以相抃今東南有棄飯而西北無糜粥咎當

誰執市人何知惟利是趨一聞米貴便謂後當大
貴益競閉匿以索高價民亦譙相告以待匱不敢
捐其一粒故價之長可立而待既聞其所有販商
至米益多則又競出以售而價之賤亦可立而待
此市情也夫以秦晉齊魯燕魏趙梁大都會之間
其右家世族豪商大賈何可勝數視其庾豈無數
年之積而坐視人死不救豈惟不拯更增其驚相
告之狀則市情為之也非無遠識之由則射厚利
故也顧此非威令之所禁口舌之所移當有輕重
之術曷不轉東南之餘補西北之不足乎轉之莫
如通商夫商之赴利甚於赴飢何待於通而不通
者有說秦之人既更相閉匿以待高價矣梁之人
亦復如秦人更相閉匿以待高價則梁之粟何以
入秦梁之人既閉糴矣即足以自給而不轉販於
吳楚吳楚之粟何以入梁吏於土者又各私其民
多其游徼而不肯聽粟出境故貴者自貴賤者自
賤貴之處狼戾而賤之處捐瘠則過糴之為害也
過糴人情也無足怪也凡民貧者多而富者寡有

司之情視貧民重而富民輕貧民苦米價之踴必請遏糴有司曲徇貧民之請亦必遏糴見牛未見羊則忍於羊而不忍於牛見已之民而不見人之民則忍于人之民而不忍于已之民故曰無足怪也顧非天地父母之心公平正大之體平天下者當使天下之粟無甚貴甚賤之處天下之民無甚有餘不足之處而後謂之平霸者尚有遏糴之禁王天下者而可任人遏糴乎哉誠厲其禁朝廷下咫尺之書朝夕至矣而愚以為無益何也掛詔于壁此有舊習而遏糴之禁上下方自以為便誰敢異言然則朝廷遣一重臣出數十萬毋錢行平準之政可乎而恐當事者不肯任即任之方且講條議令非頃刻能辨同歸於無益有策於此甚簡而易為請試效之夫決擁通滯肅人心勅紀法無如御史而筦天下利權驅役商人惟意所為無如齮使者誠詔大司徒破拘攣之格發米引數百千紙分散諸齮使令招所部商人惟其所往與所販數飛輓而前厲其禁禁所在有司不許抽分留難以

困吾商即民間私相販易者權惟商之所為有阻
格者以柱後惠文從事商人射利而又有使者為
之倚重塞之南冀之北何所不往愈遠愈災之所
其利愈厚其往愈多日夜驅而至矣商既若此則
本地積粟亦當出商未至而市價減矣此不費國
家一錢不勞國家一人而濟甚博之術也四民之
中惟商為末先王不禁而誘之使出於塗今日之
事不可以無商商爭往則吾之民免於溝壑商利
愈多民之利愈不少至於商利少之日吾之民大

無事矣或謂鹺商本以濟邊不可他用用之於彼
則妨于此此拘曲之見也救內地孰與救邊急或
又謂西北連災雖大家無厚畜此不通於市情之
論也今天偶一雨一雪米價便減豈謂一雨一雪
便能生黍稷乎民心寬而穀出也可盡謂之無畜
乎或以為東南亦見告未必有餘脫他日病將誰
任咎此尤嚮言矣善平天下不平之價者莫如商
粟出則錢入錢出則粟入商通必不使一方獨困
且濟燃眉耳無為不然之憂或又以為北方苦轉

輸率一鍾致一鍾粟雖至如貴何民苦無粟耳不
苦價高假如平時以五十錢鬻一升米可飯一人
倍之以百錢易一升米猶可粥二人與平價何異
凶年之害不過賤鬻產以求錢耳亡產雖貧不至
於死烏可與亡粟並論且並河南北舟楫所通牽
輓之費計當不多河南北之粟賤山陝亦有望矣
故曰今日之事招商其至計哉在朝廷不過數百
赫蹠之費也其次莫如開納入官入監或贖罪以
濟常平之乏雖妨於制然賢於他策遠矣

練兵議館課

夫練兵非難制兵為難古者天子用六軍征伐天
下今京營之兵十餘萬竭財畢議虛殫歲月而莫
可用以為無將耶選南北大小帥時出入其間樹
功建奇者非乏也而猶然不練非失練乃失制也
異日者羽檄交馳亦嘗扼腕悔其失而稍解嚴輒
蘇蘓亡桑土之思何哉盖有二故一曰京營士積
驕法之則構閹掖挾世家藪恂訕譁以傲命吏而
莫之誰何彼無舍矢之技尚以尺籍為剽奪虛嚇

人何況有投石超距之能桀夫逋主何所不至此
當事者若以士之服習為輦轂患而不敢練也一
曰國家以數萬人寄之一夫指揮號令惟其耳目
縱士非素練已有震主之憂而况其練乎夫用於
人而使人有疑我之志者身危則又何苦強無事
之卒以為禍媒苟且旦夕恃寇不來愈耳坐此二
故兵無練期矣夫養猫畜狗待鼠盜也以猫狗之
不制而繫縶之削弱之以為虛名不如亡有我國
家制兵近於漢漢京師有南北軍南軍衛尉主之

掌宮城門內兵北軍中尉主之掌都城門內兵至
武帝南軍增期門羽林而北軍增八校尉秩與執
金吾皆二千石不屬中尉以此言之漢以南北軍
相制又增八校分北軍之權又增羽林期門均八
校之權豈非以國之利器不宜總寄于一夫與誅
呂之役太尉入北軍而不得南軍猶莫發不謂有
所制故與明興 高皇帝以神武定天下張橐既
陳而建留守等四十八衛以衛京城視漢北軍也
設錦衣等十二衛以衛宮禁視漢南軍也留守等

衛隸之五府而錦衣等衛為親軍不隸焉又八校相制之意也夫五府者高皇帝善藏利器之道也有事則合符動衆鈎連而出所謂數起於五事已則兵歸于府將歸于朝萬一有意外一軍而四軍足以相制故兵聚而不見其形將練而不疑其危形格勢禁居重馭輕控制宇內之術在是矣文皇之作燕都也仍立五府而增七十二衛如高皇時亦復有錦衣等衛親軍又復有河南山東中都大寧四都司班軍北征之役合此三軍為三

大營以犁虜廷不幸有榆木川之事未及從容旋師放牛歸馬以貽典則於是衛軍不得歸五帥府親軍不得歸錦衣等衛班軍不得歸四都司而盡屬之三大營久屯不散掌握于一夫之手正統己巳于少保通變其事程良比銳而團之為十營天順成化之間再罷再置復增為十二營嘉靖庚戌又改營為戎政府稱名異而為實同無能奪大帥獨制之權第罷監軍大璫清私役包錢之弊為差得耳當是時帥鸞橫甚目中無天子而天幸病

以殛死不然禍可測乎自是以來典戎者容容自保不見其危雖不見其危而實無一卒可用則愚前所謂二故者為之崇焉患馬之蹄嚙而損芻抑豆絡首繫足以為安非其初千金買之之意曷不善為之制使無蹄嚙之患亦有驅馳之利乎故愚謂非失練乃失制也誠兼體祖宗之意而善制之即不還衛兵于五府還親軍于錦衣還班軍于四都司亦當因三營之故而三之以離其權去尾大不掉之患令臂指相使於是戎臣無震主之威流言不興得盡其才節制必嚴簡練必時便一戎兵無偏聚之患勢均力敵不敢訕嘯便二卒將相習則各私其下各戴其上苦樂必同法令必行便三三營並立則聲息相軋殿最相形各勤其官爭寘其力便四五人為伍十人為隊大將握竒積而數之千軍在目私役可革兵伍可實治衆如寡分數畫一以一教十以十教百不出旬月可得勝兵數萬廣徵異材或取邊郡之良受吾練法或散已練之衆分教各郡居重又輕天下之勢常在京畿

便五其大利者北極擁常尊之勢衛尉握相軋之
權鈞陳麗明蕭牆絕釁臣主之間洞無疑貳宮城
固於內京城固於外重閣複闕而九重益深此非
當今之一大籌畫乎此之不行而彼之久居因循
歲月不拔禍本倉卒有變悔當奈何且驅白徒而
使之戰必無幸也無素令而責有功必不能也故
將雖有鞭挾貫耳之法不敢用也有賈勇奮難之
忠不能用也而巡視諸臣方望苛禮持籌大臣徒
憂轉輸曾是而可以幾兵強哉故愚曰練兵非難
而制兵為難制定則十萬之師可旬月練武子斬
三隊長而婦人可使赴水火胡庸久也

閩廣善後事宜議 閣試

伏見閩廣捷書督帥協謀元兇授首海波旋靖皇
維載寧 聖心嘉悅渙布恩綸大者進爵任子小
者優賞金帛將班師內向告成事矣臣聞之善作
不如善成善始不如善終竊效杞人之憂用禕苞
桑之計臣維閩廣之變所由起者無藉之民嘯聚
山谷連衡海寇互為聲援彼海寇萍鳧而來則亦

指為內應故離之輒掎角我師合之乃益張逆焰
今長鯨就殪宜滅此朝食以絕禍本而或者以為
玉石不可並焚則先之以震疊之威而後假之以
春溫之煦斯惠不褻而民不玩可以永攝反仄之
心一也閩廣之地並海千里首尾衡決不可相掇
今以陛下威靈廟堂石畫勅兩廣福贛督撫將校
協力剿誅既已效矣然大軍不可久聚職守不可
不明無亦講先時之典參以當今之議舉兩廣仍
轄梧州開府析潮惠仍轄贛州開府而福建自為
一開府職掌嚴明體統有定無事則各控境內有
事則相連而出永著為令于事為便蓋兩廣事宜
大略相軋廣西徭獞勢不得以時即寧頃以朝命
且舍而有事於海上終不可以海上遂忘諸徭獞
之憂潮惠二郡去贛邇甚舊以相屬不為無意閩
中故無開府數十年來乃以事起盡當早為講置
二也雖然斯二者猶末也無亦本之是務乎蓋閩
廣本百粵地外通諸番內接中國犀玉金貝煜熠
耳目而居民互市往來以射厚利遂令兇頑相搆

為盜若乃仕其上者又率弋取長物虐徃實歸徃者賄官選曹率以萬金一郡千金一邑取官若此安得不苛陵夷召亂其本坐此今欲禁海市以絕奸商之覬覦則利孔所在民以死赴而卒不可禁欲嚴保伍以譏居民之出入則小民相容為奸利吏不得問以臣計之其蠲租庸以輯流民乎通市舶以睦諸夷乎練兵實以威群醜乎而又責成于賢有司不可後也臣聞廣東之食僅能卒歲一有不虞輒仰食廣西今大軍之後飢饉必至流離之子豈任農作謂宜移粟轉餉以活元元復之數年無所徵取而後邑里可實也市舶之利國家行之二百年而敝于今日法令奪於豪右而官方邪也如其戢吏貪使監權者無所利其入抑豪右使登壟者無所肆其奸則海南諸夷可係而羈矣諸夷之強弗順者獨倭耳毒螫浙直幾二十年卒以大創去苟能輯柔吾民絕彼嚮導簡練吾卒使生鬪心彼敢加一矢乎是故善為之謀以制其鋒海上之兵未可議罷也斯三者其事總之督撫而分之

守令表廉黜頑又為之本矣夫志士厲節則貪泉
易名廉吏有聲則浦珠再至斯亦嶺表之芳躅乎
今陛下既檢飭百司請謁不行猶當厲貪墨之誅
重勞來之賞令吏不厭清貧不寶珠玉祖烹鮮之
遐訓鏡理絲之良猷治效宣灼則璽書慰藉增秩
勿徙此至務也然為政有紀執紀有官今撫臣者
非其官乎監司視之以浮窳其節黔黎視之以息
耗其風奸究偵之以昌寢其惡國家倚之以休龐
其治如得三良撫臣而患群有司之不良閩廣之
不定未之有也諺曰不防其類漸至無寸戎事雖
畢類亦甚矣揀水火者不終日非宜悠悠焉爾也
惟 陛下財擇

新建文成侯謚議 館課

故新建伯王公守仁崛起豪傑任道不疑許國以
身屢夷大難束髮登朝輒疏逆瑾之惡遠謫龍場
狼狽無入之地與鬼為伍絕生還望而無怨心闔
慙就戮颺歷通顯功在西南瘴厲為清雖甚奇偉
然猶人所不能也惟是濠庶人稱戈犯順窺竊神器

逆旗蔽江虐燄熏天郡邑震動望風奔走而公適奉命南贛不以行旅為解獨投吉安約衆倡戰練兵豐城既曳敵尾收復南昌遂傾狡窟安慶之圍一解而鄱陽之甲遂奔彌天之惡敵於一水十年之謀破於七旬至其處群小之嗾折貂狐之謀守正不阿江右倚以為重卒使六飛迴馭萬家帖席斯近古之所難也蓋其學本師心知由天授獨破千古自信直前捐拘攣之曲見除泛濫之多岐屢濱顛沛流離九死而益堅雖當干戈羽檄倥偬而不廢神定而氣完理明而幾決故能臨事不眩而建立若此按謚法道德博聞曰文安民立政曰成夫公之學何媿道德以約為博尤其所長戡亂安邦易危為安卓懋丕明厥功尤偉謚曰文成似所宜蒙昔張良以文成謚侯于漢劉基以文成謚侯于今皆以開國佐命參謀帷幄然張良氣象雖似儒者而文學之彬彬似不逮基劉基運籌雖曰巧妙而百不一失視良亦讓公方二臣雖禽雉之功僅收于一戰而制勝之術非出於幸

學不恤人言自謂卓然于千載之下矣方之近代
莫與為二稽古易名于情為稱謹議



